

# La Lombardia mussa colur

Schientscha nova tranter Alps e Po

DA GUIU SOBIELA-CAANITZ

■ **Tgi da nus n'è mai i en las stizuns da Clavenna, Livign u Tiraun, turnond en Grischnun cun tutta sort rauba e victualias? 1997 avainsa commemorà la separaziun da lezzas valladas avant duatschient onns.** Dapi 1861 fan ellas part d'Italia (oz 58 milliuns olmas), dapi 1870 è Roma lur chapitala politica. Adina dapli ston ins dentant quintar cun in'otra, numnamain Milaun, uffizialmain «be» «capoluogo» da Lombardia, pia «lieuchau», però vaira chapitala da lezza regiun che cun indesch provinzas e nov milliuns olmas è la locomotiva economica d'Italia.

## Ina victoria federalista

La Lombardia è l'emprima regiun taliana per ils deposits da banca e tar la posta (22 711 e 21 866 milliardas liras; Italia: 980 212 e 197 285), per la deraaziun da gasettas (strusch 700 000; Italia: 3 milliuns), per il dumber d'atgats da telefon (4,4 milliuns encunter 25) e da conversaziuns telefonicas (strusch 600 000; Italia: strusch 2,7 milliuns). Il pievel lumbard, sco quel da bunamain mintga regiun taliana, ha elegì directamain ses parsura ils 16 d'avrigl 2000. Il victur, Roberto Formigoni (62% da las vuschs), sco era ses quatter collegas da Friul-Venezia Giulia, Liguria, Piemont e Veneto (respectivamain 1,2, 1,6, 4,3 e 4,5 mil-

liuns olmas), appartegna ad ina coali-ziun da partidas che ha firmà avant l'elecziun in «Program per la realisaziun concreta dal federalissem». Formigoni, legitimà da la tschernu populara, n'ha betg spetgà ditg per mussar colur. Ils 24 da matg han ses sedesch «assessori» (cussegliers governativs) prestà sarament d'uffizi tenor ina formulaziun nova e provocanta: «Jau engirel fidaivladad a la Lombardia e ses pievel, observaziun loiala da sia constituziun e sias leschas en il respect da la constituziun taliana, adempliment da mes duairs en l'interess exclusiv dals burgais»<sup>1</sup>). Ils tschintg presidents regiunals pretendan autonomia t. a. per las taglias, la scola, la sanitad, la segi-

rezza e l'immigraziun, sco era «il dretg da far part da las sessiuns parlamentaras da l'Uniun europeica tar discusiuns davart materias che pertutgan lur regiuns»<sup>2</sup>).

La victoria da lur coaliun federalista en la part la pli gronda dal nord mussa che lezzas regiuns s'opponan adina dapli a la mesinsla e cunzunt a la centrala romana.

<sup>1</sup> **Marcello Chirico, La giunta Formigoni giura sulla Lombardia, en: Il Giornale, 24 da matg 2000, p. 5 (addressa: Società Europea di Edizioni spa, Via G. Negri 4, I-20123 Milaun; telefax 0039 02 72023859 e 0039 02 72023880; posta electronica: segreteria@ilgiornale.it).**

<sup>2</sup> **Le richieste dei governatori del nord, en: Il Giornale, 14 da zercladur 2000, p. 7.**